

ODLUKA

**O PRIHVATANJU ZADUŽENJA PO SPORAZUMU O FINANSIRANJU
IZMEĐU BOSNE I HERCEGOVINE I MEĐUNARODNE ASOCIJACIJE ZA
RAZVOJ (IDA) ZA REALIZACIJU PROJEKTA ENERGETSKE
EFIKASNOSTI**

Na osnovu člana 40. stav 5. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09 i 44/10) Predstavnički dom Parlamenta Federacije Bosne i Hercegovine na svojoj _____ sjednici održanoj _____ godine i Dom naroda Parlamenta Federacije Bosne i Hercegovine na svojoj _____ sjednici održanoj _____ godine d o n o s i

ODLUKU

O PRIHVATANJU ZADUŽENJA PO SPORAZUMU O FINANSIRANJU IZMEĐU BOSNE I HERCEGOVINE I MEĐUNARODNE ASOCIJACIJE ZA RAZVOJ (IDA) ZA REALIZACIJU PROJEKTA ENERGETSKE EFIKASNOSTI

I.

Prihvata se zaduženje Federacije Bosne i Hercegovine (u daljem tekstu: Federacija), po Sporazumu o finansiranju (u daljem tekstu: Sporazum) između Bosne i Hercegovine i Međunarodne asocijacije za razvoj (u daljem tekstu: IDA), u iznosu do 12.480.000,00 SDR (ekvivalent 18.950.000,00 USD) što iznosi 60% od ukupno odobrenih sredstava za Bosnu i Hercegovinu koja iznose 20.800.000,00 SDR (ekvivalent 31.600.000,00 USD).

II.

Sredstva Sporazuma iz tačke I. ove Odluke koristit će se za finansiranje Projekta energetske efikasnosti. Primarni cilj Projekta je pokazati koristi od energetske efikasnosti u zgradama javnog sektora i pružiti podršku za izradu prilagodljivih modela finansiranja energetske efikasnosti.

III.

Sredstva Sporazuma iz tačke I. ove Odluke, odobravaju se Federaciji pod sljedećim uslovima:

a) Iznos od 10.920.000,00 SDR (ekvivalent 16.580.000,00 USD):

- rok otplate:.....25 godina
- grace period:.....5 godina
- maksimalna stopa troškova održavanja kredita:.....0,5% godišnje
- servisni troškovi:.....0,75% godišnje
- kamatna stopa:.....**1,25% godišnje**
- dospjeća:.....polugodišnja
- datumi plaćanja glavnice i kamata:.....15. februar i 15. august svake godine

b) Iznos od 1.560.000,00 SDR (ekvivalent 2.370.000,00 USD):

- rok otplate.....25 godina
- grace period:.....5 godina
- maksimalna stopa troškova održavanja kredita.....0,5% godišnje
- servisni troškovi:.....0,75% godišnje
- kamatna stopa.....**1,40% godišnje**
- dospjeća:.....polugodišnja
- datumi plaćanja glavnice i kamata:.....15. februar i 15. august svake godine

IV.

Potvrđuje se da je razmatrana dokumentacija prihvatljiva za Federaciju, a posebno:

- Usaglašeni zapisnik s pregovora;
- Dodatak usuglašenom zapisniku s pregovora;
- Sporazum o finansiranju između Bosne i Hercegovine i IDA-e;
- Federalni projektni sporazum zaključen između Međunarodne asocijacije za razvoj i Federacije Bosne i Hercegovine;
- Dokument o procjeni Projekta energetske efikasnosti (PAD);

V.

U cilju formiranja revolving fonda dio sredstava iz tačke I. ove Odluke u iznosu do 7.100.000,00 SDR (ekvivalent cca 10.780.000,00 USD) namijenjen za investicije u energetske efikasnost javnih objekata, Federacija će prenijeti na kreditnom osnovu krajnjim korisnicima (kanton, grad, općina), u zavisnosti od njihove kreditne sposobnosti.

U periodu implementacije Projekta, u budžetu Federacije nije potrebno osigurati dodatna finansijska sredstva za sufinansiranje Projekta.

Projekt će implementirati Jedinica za implementaciju projekta, formirana u Federalnom ministarstvu prostornog uređenja.

VI.

Zadužuje se Federalno ministarstvo finansija-Federalno ministarstvo financija da na prijedlog Federalnog ministarstva prostornog uređenja sa krajnjim korisnicima sklopi odgovarajuće Podugovore o zajmu kojima će se, u svrhu redovne otplate, definirati uslovi vraćanja sredstava koja se prenose na kreditnom osnovu.

VII.

Daje se saglasnost za zaključivanje Supsidijarnog sporazuma o zajmu između Bosne i Hercegovine i Federacije za sredstva iz tačke I. ove Odluke i Podugovora o zajmu između Federacije i krajnjih korisnika (kanton, grad, općina), za dio sredstava koje će se na kreditnom osnovu prenijeti krajnjim korisnicima.

Za potpisivanje Supsidijarnog sporazuma i odgovarajućih Podugovora o zajmu sa krajnjim korisnicima ovlašćuje se federalni ministar finansija - federalni ministar financija.

VIII.

Za realizaciju ove Odluke i izvještavanje zadužuje se Federalno ministarstvo finansija - Federalno ministarstvo financija, Federalno ministarstvo prostornog uređenja i Jedinica za implementaciju projekta, svako u okviru svoje nadležnosti.

IX.

Implementacija Sporazuma iz tačke I. ove Odluke, ne zahtijeva donošenje novih ili izmjenu postojećih zakona.

X.

Ova Odluka stupa na snagu narednog dana od dana objavljivanja u "Službenim novinama Federacije BiH".

OBRAZLOŽENJE

Pravni osnov

Pravni osnov za donošenje ove Odluke sadržan je u članu 40. stav 4. Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br: 86/07, 24/09 i 44/10), koji propisuje pitanja vanjskog zaduženja Federacije i procedure za zajmove. Izmjenom Zakona o dugu, zaduživanju i garancijama u Federaciji Bosne i Hercegovine („Službene novine Federacije BiH“, broj: 44/10) u članu 40. stav 5. predviđeno je da Vlada Federacije Bosne i Hercegovine nakon prihvatanja Nacrta kreditnog sporazuma i utvrđivanja Prijedloga odluke, istu dostavlja Parlamentu Federacije BiH na usvajanje.

Razlozi za donošenje

Strategija partnerstva Svjetske banke za Bosnu i Hercegovinu (Country Partnership Strategy, CPS) za period od 2012. do 2015. godine uključuje Projekt energetske efikasnosti.

Osnovni razlog za donošenje ove Odluke je zaduženje Federacije Bosne i Hercegovine po osnovu Sporazuma o finansiranju kod Međunarodne asocijacije za razvoj (IDA) za Projekt energetske efikasnosti.

Cilj projekta je pokazati koristi od energetske efikasnosti u zgradama javnog sektora i pružiti podršku za izradu prilagodljivih modela finansiranja energetske efikasnosti.

Projekt će se sastojati od tri komponente koje će se provoditi odvojeno u svakom entitetu:

- (1) investicijska komponenta;
- (2) komponenta podrške za razvoj prilagodljivih mehanizama finansiranja i za izgradnju kapaciteta; i
- (3) komponenta upravljanja projektom.

Obrazloženje pojedinih tačaka

Tačka I. je nužna kako bi se prihvatilo zaduženje Bosne i Hercegovine kod Međunarodne asocijacije za razvoj (IDA).

Tačkom II. potvrđuje se namjena utroška sredstava Sporazuma.

Tačkom III. precizirani su uslovi Sporazuma.

Tačkom IV. potvrđuje se da je dokumentacija parafirana tokom pregovora sa Međunarodnom asocijacijom za razvoj (IDA) prihvatljiva za Federaciju BiH, što je uslov da Bosna i Hercegovina i Međunarodna asocijacija za razvoj (IDA) pristupe potpisivanju Sporazuma o finansiranju.

Tačkom V. se definira da nije potrebno osigurati dodatna sredstva u budžetu Federacije za ovu namjenu.

Tačkom VI. zadužuje se Federalno ministarstvo finansija-financija da na prijedlog Federalnog ministarstva prostornog uređenja sa krajnjim korisnicima sklopi odgovarajuće Podugovore o zajmu.

Tačkom VII. daje se saglasnost za potpisivanje Supsidijarnog sporazuma i Podugovora o zajmu sa krajnjim korisnicima, kao i ovlaštenje federalnom ministru finansija - federalnom ministru financija da u ime Federacije potpiše iste.

Tačkom VIII. se za realizaciju ove Odluke zadužuje Federalno ministarstvo finansija - Federalno ministarstvo financija i Federalno ministarstvo prostornog uređenja i Jedinica za implementaciju projekta svako u okviru svoje nadležnosti.

Tačka IX. potvrđuje da za implementaciju Sporazuma o finansiranju nije potrebno donijeti nove ili izmijeniti postojeće zakone.

Tačka X. propisuje stupanje na snagu ove Odluke.